



**Senin, 3 Januari 2022**  
**Ogen: Kejadin 5: 21-24**



**Tetap erdalan ras Dibata**



**L**a erngadi-ngadi kita ngataken bujur man Tuhan i bas penemani dingén pengarak-ngarakNa man banta i bas tahun si mbaru enda. Kata tema sendah ngingetken kita gelah tetap setia erkiniteken man Tuhan i bas ndalani tahun 2022 enda. Medak erpagi-pagi sioge ras siukur-ukuri alu mbages Kata Dibata dingén tetap sidadahken perbahanen-perbahanen si ngena ate Tuhan. Ertina, teridah maka kegeluhenta enda erdalan i bas 'rel' si itetapken Dibata man banta. E maka tetaplah mindo gegeh man Tuhan gelah ukurta pe tetap setia man Tuhan.

Enoh labo gedang ituriken i bas Pustaka si Badia. Saja penekanenna e me kap ia sekalak si patuh dingén setia nandangi Tuhan. Kegelhenna lit i bas dalan Dibata, ia e me kap bapa sekalak si gedangna umurna i bas doni enda. Ia me bapa si Metusalah. Dungna lanai ia teridah i bas doni enda perbahan ia iangkat Dibata. Si nuliskan Kitab Heber mpetangkas kerna Enoh maka i bas ia terangkat e labo ia mate. Ise pe lanai ngasup njumpai ia, ia istimewa sabab kerina si ibahanna i bas kegeluhenna sentudu ras peraten Dibata (Heb. 11: 5).

Tuhu maka kegeluhenta enda labo lepas i bas kelepakén ras kekurangan, sabap ayam-ayam kegeluhenta e me kesusahan. Selaku Moria melala si man alanken subuk anak-anak entah perbulangen. Banci saja mesera man aturenken, mesera mpersada arih, perbeben ekonomi i bas masa pandemik, bage pe suasana-suasana anak-anak masuk sekolah. Tapi adina sipindo gegeh man Tuhan ngasup kita mpertahanken kegeluhen kinitekenta tetap setia baNa. Ndaui i bas jungut-jungut dingén aru ate. Kerembaken ras Tuhan e nampati kita ngasup nggeluh bujur dingén mehuli. Sabap si man usihen e Dibatanta si tuhu-tuhu mehuli.